



DEO OPTIMO MAX.
UNI ET TRINO.



VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS
manè discutienda, in Scholis Medicorum, die Lunæ trigesimo
Decembris, anni M. DCC. XXXVII.

M. JOANNE-FRANCISCO LEAULTÉ,
Doctore Medico, Præsides.

An Diluentia, in affectibus Melancholicis, purgantibus preferenda?

I.



MELANCHOLICO morbo nihil frequentius, sanatu
difficilius nihil. Hic à mente oriundus, mentem mille
modis cruciat. Homo, quâ parte cæteris animantibus præ-
cellit, eâ ipsâ, morborum insultibus magis pater.
Imò qui, vel meditando, vel in artibus ediscendis, vitam
colocant suam, ii plerumque sunt infelicioris valetu-
dinis. Hofce, ferè omnes, Melancholia lentè consumit. Non mæror so-

2

lus, aut labor improbus, assidueque vigiliæ gignunt Melancholiam. Illa, & ab immodicâ latitiâ, quis credat? & ab otiosâ quiete ortum repetit. Amor vehemens, insolens cupiditas, invidia, ut plurimum certa sunt, aut præsentis, aut mox futuræ Melancholiæ signa. Ab his animi affectibus, sensim aut subito, labascit functionum integritas. Scilicet fibrarum robur atque elaterium debilitantur, earum oscillationes vitiantur. Motus alterni sanguinem, & parcius & ignavius, impellunt, attenuant, elaborant præterlabentem. Hinc omnis corruptipitæ secretionum ordo. Hinc sanguis ipse languidius actus, ultrò spissatur, acoremque innumerabilium ægritudinum fontem inexhaustum contrahit. Quin imò, hic suo volatili balsamico defraudatus, ut iners limus, stagnat in vasis. Mirum quot inde sobolescant symptomata, quæ miseros mortales distorquent. Mens vanis imaginibus deluditur. Depascitur corpus omni dolorum genere excruciatum. Qui unæ cogitationi semper affixus, aliquandò & diu sine febre, delirat, is Melancholicus habetur. Morbificus humor adhuc delitescit in venis. Visceribus mox ille cohærebit, nisi in eo depellendo quamprimum invigiles. Totis igitur viribus succum abluæ noxium. Exit sponte suâ succus, quantumvis sit tenax, si sat benè diluatur. Hæc præferenda sunt remedia quæ tutius morbum sanant.

I I.

MORBUM hunc simplicem ne crede. Gradus ille habet, inter se, longè diffitos. Succus acefcens minimis in vasis, dum vi circuitus abripitur in majora vasa, totam sanguinis massam equaliter inficit. Hinc primus Melancholiæ gradus. Vigente causâ, crescit succi depravati moles; inspissatur ille magis & in vasis hypochondriaci depositus hæret. Hic majorem ruinam minatur. Horrenda per symptomata ille se manifestat. Reverâ non accidit quin in vasis hypochondriaci jam fixata compactaque morbifica materies, diu hæserit. Fiunt inde obstructions ubique, stagnans lymphæ acefcit, moles ejus aggeritur, extenduntur vasa, roduntur. Hinc viscerum abdominis ingens alteratio, vicinorum fors non beatiôr. Respirationis organa malè se habent. Per consensum obruitur caput, & inquinatis spiritibus, omne genus mania suboritur. Aegrorum alii se vitreos autumant, neque quidquam tangere audent, ne ipsi confringantur. Alii se mortuos credunt, atque ob id se ab omni potu ciboque interdiciunt. Hi se aliquo membro carere existimant, neque ullo modo eo uti volunt; illi se in bruta mutatos putant. Quid non efficit tardus & acefcens sanguis? quæ symptomata, si visceribus ille semel inhæserit?

I I I.

OPPUGNETUR ab initio tot morborum ferax humor, radix mali præcidatur. Sed, quâ ratione præstiteris, cave. Succus crassus atque acore imbutus durum non patitur imperium. Medicamenti vim facillè eludit. Quò tenaciùs partibus inhærescit, eò ferociùs, si cogitur, sævit. Curationem evacuantibus, vel quidem levissimis, si tentaveris; humores sani & facillè mobiles soli expellentur, tenaces verò magis hærebunt. Hinc peior morbus. Stimulantiæ aut valde solventia exhibe, materies subito soluta fiet acris, & impetu magno irruens in tenera hypochondriorum vasa, ea destruet. Indè multa & immedicabilia mala.

Alterantia quæ humores vehementer exagitant; non minus afferunt damnum. In hoc morbo diluentia cæteris præstant medicaminibus. Confectos sanguinis globulos dividendo, emolliendoque fibrarum rigiditatem, tutius illa Melancholiam sanabunt. Melancholicorum fibræ salium aculeis indefinenter punctæ rigent, & in spasum maximè propendent, sanguis ipse malè coheret. Pars globosa fixioribus imbuta salibus arefcit, vehiculum suum lympham exprimit. Lympha subtilioribus saturata, proinde partibus enutriendis inepta, hùc illuc; per membra dolores latura devagatur, diluentia hæc sunt quæ lubricis volubilibus ac globosis constant particulis. Quid feliciùs, regentes fibras laxare, partiumque sanguinis miscelam restituere potest, quàm medicamenta, quibus tanta inest cum sanguine affinitas.

I V.

QUÆ sit diluentium cum sanguine proportio, ex utriùsque naturâ abundè patet. Ex indole morbi, quanti sit momenti in affectibus Melancholicis diluentium usus, facilè dignoscitur. Sanguis geminâ parte, constat, alterâ rubrâ, albâ alterâ. Hæc tenuis & lubrica, illa globosa & volubilis admodum, utraq; in statu sanitatis, amico nexû unitur; utraque, solidorum verberibus, æqualiter subjecta, perenni circuitu volvitur. At vero in Melancholico morbo, eoque ideâ tristi potissimum abortu, constringuntur fibræ. His contractis, languidè & inæqualiter pulsatur sanguis. Necessariò igitur tardefcit ille & spissatur; à tarditate sololefcit aciditas, quæ noxias acquirit vires eundo. Acor cruoris globos cogit in unum, densat, indurat. Hi ergo ad motum fiunt inhabiles. Segregantur à lymphâ, in quâ priùs natabant, & ex quâ suam mutuabantur volubilitatem. Ecquid, partes sanguinis morbo dissociatas, aptiùs consociare valet, quàm diluentia, quorum particule sunt, sanguinis particulis miscendis tenuandisque, tam habiles? Rigent fibræ? Quid eas jucundiùs tutiùsque laxabit, quam liquidum dulce & salibus mergendis idoneum? Diluentia nascentes arcent spasmos, & acorem quemvis obtundunt. Hæc fluida pandendo dividunt, solidaque humectando & emolliendo relaxant. Diluentium nomine, sola intelligenda veniunt potulenta, decocta, succi, cremores, sorbitiones &c. Hæc, quot quot sunt, obstrukciones sensim sine sensu referant, solvunt repagula, vincunt obices, facilemque noxio humori sternunt viam, ut, quâ datâ portâ, ille ruat.

V.

EFFECTUS tam felices non sunt à purgantibus expectandi. Si quis purgationi, in affectibus Melancholicis, locus concedatur, is solum sub finem esto. Frustrâ clamitant, ejiciendus est morbosus humor. Quâ ratione potest absque purgantibus? Lenis purgatio succum vix tractabilem ad exitum quasi invitat. Hæc, quem offendit humorem Melancholicum, amicè propellit. Non irritat excretioni imparatum. His credere verbis cæcutire est. Purgantia non agunt, nisi vellicando, irritando, conquassando. Purgatio quas sublevat partes deterit. Fœneratorum more, illa nocendo juvat. Vix aliquandò corpori, absque viscerum dispendio, prodest. In affectibus Melancholicis semper ea nocet, nèdum aliquandò profit. Quid istud inquires? Tussiculosi, Iputatores, catarrhosi

4

sant Melancholici, Redundant ergo humores serosi, purgatione solâ, educendi. Reipsâ humores serosi redundant: at verò ex eò duntaxat, quod ii à sanguinis substantiâ, vi morbi, non naturâ victricis conamine exprimentur. Idcirco ægrotantem eò lædes magis, quò plus feri educeris. Ut sejunctæ sanguinis genuinæ partes in unum coalescant, hoc opus, hic labor est. Unicus tamen hic esse debet medentis scopus, quoniam ab eo pender sanitatis restitutio. Id tutò, id jucundè præstant diluentia. Salia mergendo eorum actionem coercent. Ea sui liquoris tenuitate, compactos induratosque globos evolvunt & expliquant. Hi leviores facti, suo loco moveri incipiunt, assuetumque iter denuò meriuntur. Sanitas tandem à diluentibus restituitur, arcetur à purgantibus.

Ergo Diluentia, in Melancholicis affectibus, purgationi preferenda.

DOMINI DOCTORES DISPUTATURI.

- | | | |
|---|--|---------------|
| <p>M. Franciscus - Josephus
Hunauld, Chirurgiæ
Professor, Regiæ Scien-
tiarum Academiæ & Re-
giæ Societatis Londonen-
sis Socius, in Horto Regio,
Anatomie & Chirurgiæ
Professor ac Demonstra-
tor.</p> | <p>M. Paulus-Jacobus Malouin. M. Claudius Bruner;</p> | |
| <p>M. Ludovicus - Petrus le
Hoc, Scholarum Pro-
fessor, Consiliarius Me-
dicus Regis Ordinarius in
ejus Castellato.</p> | <p>M. Joannes-Baptista Boyer, M. Ludovicus de Sament.
Regis Consiliarius & in
Senatu Parisiensi Medicus
Ordinarius.</p> | |
| <p>M. Antonius - Nicolaus
Guenaub.</p> | <p>M. Bernardus de Jussieu, M. Emmanuel-Mauritius de
Regiæ Scientiarum Aca-
demiæ, Regiæque Socie-
tatis Londonensis Socius &
in Horto Regio Botanicæ
Prodemonstrator.</p> | <p>Verney</p> |

Proponebat Parisiis, JOANNES MIDY, Lemovicus;
Baccalaureus Medicus, A.R.S.H. 1737. à 6^h ad meridiem.